



**M**Aximilianus natus fuit in Celeia nobili ciuitate Pannoniæ, quæ hodie Cilia dicitur, ex magnis & claris parētibus. Ab ijs filius magna pietate à teneris annis in fide Christiana, sub Oranio præceptore, optimè educatus & instructus fuit. Cũ aut̃ 14 annos ageret, patrē amisit, & sexto anno post etiã matrem. Maximilianus itaq; utroq; parente orbatus, familiam quam numerosam possedit manumisit, & cuiq; de prædijs suis, iuxta suam conditionem distribuit, reliqua egenis contulit. ipse autē uitæ ac morum sanctitate conspicuus, totus orationibus, uigilijs, & ieiunijs fuit deditus. Postquam uerò S. Quirinus in Aquileiensem sedem esset uocatus,

Maximilianus contra suã uoluntatem Laureacensis præsul ordinatus fuit. ubi etiam omnibus charus diu Christi ueram doctrinam eius regionis incolis communicauit. Tandem uerò cum Tyranni Romę contra pios sæuissent, ipse eorum furorem & rabiem contempsit, atq; in urbem profectus, fratres confirmauit, & à Sixto Põtificè benedictionem accepit. Domum reuersus etiam in patriam sese contulit, & Cileię incolas quotidiana uerbi Dei prædicatione rectè instituit. Sed cum Numerianus Imperator, post Carum patrem & fratrem Carinum, quendam Eulalium præfectum Cileiam misisset ut Barbarorum insultus cõpesceret, is edicto cauit ut omnes stato die Deo Marti ob uictoriam adipiscendam libarent. Vnde multi metu Tyrannidis etiam sacris initiati in templum conuenerunt. At Maximilianus Episcopus solus, quasi (omnibus huius mundi bonis contemptis) præfectum increpat, & unum Deum Iesum Christum inuocãdum re & uerbo fatetur. Cum etiã Tyrannus hunc suis blanditijs à suo proposito abducere uellet, à pio præfule acrius increpatur. Sæuus itaq; præfectus bile commotus extra muros Celeiæ diuum obrūcat, id quod factum est anno salutis per Christum partæ ducētesimo octogesimo octauo, quum uiginti annis Ecclesiæ Laureacensi præfuisset. Ab hoc Martyre postea Fridericus tertius Imperator (qui Cileiæ ex maximo periculo liberatus fuit) suum filium Maximilianum, postea Cæsarem denominauit. Cusp̃in. in Austria, & in uita Max.